



FYLKESMANNEN
I ROGALAND

Dykkar ref.:

Vår dato: 20.07.2016
Vår ref.: 2016/5602
Arkivnr.: 433.0

Morten Svandal
Saudavegen 4230
5583 VIKEDAL

Postadresse:
Postboks 59 Sentrum,
4001 Stavanger

Besøksadresse:
Lagårdsveien 44, Stavanger

T: 51 56 87 00
F: 51 52 03 00
E: fmropost@fylkesmannen.no

www.fylkesmannen.no/rogaland

Løyve til å plante utanlandske treslag til juletreproduksjon, gnr/bnr 73/9 Imsland, Vindafjord

Morten Svandal får løyve til utsetting av fraseredelgran og nobeledelgran på gnr/bnr 73/9 i Vindafjord kommune. Formålet er juletreproduksjon. Løyvet gjeld for 10 år. Det er sett vilkår om at alle tre skal fellast innan 15 år etter planting.

Vi viser til søknad mottatt 29.04.2016 om løyve til planting av utanlandske tre til juletreproduksjon på Imsland i Vindafjord kommune.

Heimel

Utsetting av utanlandske treslag krev godkjenning frå Fylkesmannen i samsvar med *forskrift om utsetting av utanlandske treslag til skogbruksformål (25.05.2012 nr 460)*, jf. naturmangfaldlova kap IV.

Søknaden

De søker om utplanting av utanlandske treslag på to område på om lag 23 daa kvar, totalt om lag 46 daa. Treslaga som det blir søkt løyve til er fraseredelgran (*Abies fraseri*) og nobeledelgran (*Abies procera*). Det er søkt om å plante 2000 planter per år av kvar av treslaga på desse areala.

Dei aktuelle areala er på eigedomen gnr/bnr 73/9 i Vindafjord kommune, og inngår i eit større areal på 450 daa som i 2013 fekk løyve til planting av normannaedelgran (*Abies normanniana*) og fjelledelgran (*Abies lasiocarpa*), innteikna på kart vedlagt søknaden. Treslaga som no blir søkt om skal inngå på det same arealet. I søknaden opplyser de at de ønsker å teste vekstvilkåra for desse treslaga, då dei ikkje er i stor kommersiell produksjon i Noreg i dag.

Søkjar skriv at juletreproduksjonen sørger for kontinuerlig innhausting lenge før trea får spiredyktige frø, og at tiltaket ikkje medfører risiko for spreiding til naturen rundt utsettingsområdet.

Fylkesmannen si vurdering

Føremålet med forskrifta er å hindre at planting av utanlandske treslag gjev uheldige konsekvensar for naturmangfaldet. Det er sentralt å sikre at forvaltingsmåla for naturtypar og artar ikkje blir truga av dei framande artane, direkte eller indirekte, jf. naturmangfaldlova §§4 og 5. Alle offentlege vedtak som kan ha verknader for naturmangfaldet skal vurderast etter naturmangfaldlova §§ 8 – 12.

Lav risiko knytt til tiltaket

§ 8 sett krav om at vedtak bygger på kjend kunnskap. Fraseredelgran er ikkje vurdert av Artsdatabanken som ein art med kjend risiko for naturleg spreiding eller følgjeeffektar i norsk natur (Norsk svarteliste 2012). Nobeledelgran er karakterisert som ”låg risiko”. Det er ikkje verna område, naturtypar eller kjende artar i nærleiken som kan bli uheldig påverka av tilplantinga. Plantefelta legg beslag på noko areal, karakterisert som eksisterande juletreffelt og granskog.

Ut frå føre-var-prinsippet (§ 9) er det viktig å sikre seg mot at plantefelt kjem ut av kontroll, til dømes ved at trea ikkje når alder for frøspreiing. Risiko for spreiding blir handtert gjennom vilkåra til løyvet.

Tiltaket bidreg lite til auka belastning

Påverking av økosystemet skal vurderast ut frå samla belastning som økosystemet er eller blir utsett for (§ 10). I dette høvet kan vi ikkje sjå at tiltaket legg beslag på eller er vesentleg trugsmål mot stadeigne naturkvalitetar.

§ 11 adresserar ansvaret for eventuelle skader på naturmiljøet til tiltakshavaren. Kostnader ved å bøta på eventuelle skader eller førebygge skadar skal dekkast av tiltakshavar, så langt dei er innanfor rimelege grenser.

Driftsmetodar og teknikkar skal i utgangspunktet ta best mogleg omsyn til naturmiljøet, slik at resultatet gjev dei beste samfunnsmessige resultata (§ 12). Vi har ikkje spesielle merknadar til dette i denne saka.

Samla vurdering

Vi kan ikkje sjå at planting av dette treslaget vil vere til vesentleg skade for naturmangfaldet. Dei aktuelle treslaga har ikkje stor risiko på svartelista, og det er ikkje registrert spesielle naturverdiar som kan bli truga av tiltaket på eller umiddelbart ved plantefeltet. Det er likevel viktig å sikre seg mot eventuell frøsetting. Det er naudsynt å dokumentere rutinar for å hindre spreiding, og kven som har ansvar for å sikre hogst før frøsetting innan løyvd tidsramme. Det er og viktig at dette dokumentet blir gjort kjend og overført samtidig som eventuelt eigarskifte til ny eigar.

Samstundes vil vi minna om at skogbrukslova med underliggende forskrifter, mellom anna *forskrift om berekraftig skogbruk* (07.06.2006 nr. 593) også gjeld for juletre- og pyntegrøntproduksjon. Her er det også ein del miljøomsyn som må takast, t.d. avstand til vassdrag, myr, osv.

Vedtak og vilkår

Fylkesmannen gjev med dette løyve til utsetting av fraseredelgran og nobeledelgran på avmerka område i kartvedlegg vedlagt søknaden. Området er på Imsland i Vindafjord kommune. Løyvet gjeld i ti år fram til år 2026.

Det blir sett som vilkår at alle trær som er omfatta av vedtaket skal fellast innan 15 år etter planting. Eigaren av arealet er ansvarleg for felling. Vilkåret for dette løyvet skal gjerast kjend for ny eigar ved eventuelt eigarskifte.

Dette løyvet er berre gitt på bakgrunn av risiko for spreiding av utanlandske treslag, og er heilt uavhengig av handsaming etter anna lovverk. Det er til dømes naudsynt å ha løyve frå kommunen til omdisponering etter jordlova sine reglar når plantefeltet er på dyrka jord.

Tiltaket skal ikkje utførast før tidlegast ei veke etter at klagefristen er ute og ein eventuell klage er ferdig handsama.

Klage

De kan klaga på vedtaket innan 3 veker etter de har mottatt dette brevet, jf. forvaltningslova sine reglar. Ein eventuell klage skal sendast til Fylkesmannen i Rogaland. Dersom Fylkesmannen ikkje gjer om eige vedtak, skal klagen handsamast av Miljødirektoratet.

Med helsing

Sissel Endresen
fung. landbruksdirektør

Elisabeth Schmidt
rådgjever

Dokumentet er elektronisk godkjent og har derfor ikkje underskrift.

Saksbehandlar: Elisabeth Schmidt
Saksbehandlar telefon: 51568784
E-post: fmroesc@fylkesmannen.no

Kopi til:
Vindafjord kommune Rådhuset 5580 Ølen
Miljødirektoratet Postboks 5672 Sluppen 7485 TRONDHEIM